

Կ. Ա. ԽՈՒԴԱՎԵՐԴՅԱՆ, «ԿՈՒԼՏՈՒՐԱԿԱՆ ՀԵՂԱՓՈԽՈՒԹՅՈՒՆԸ ՀԱՅԱՍՏԱՆՈՒՄ»

Հայաստանում կուլտուրական շինարարության պատմությունը հայ ժողովրդի սոցիալիզմի ժամանակաշրջանի պատմության անբաժան մասն է կազմում: Այն սերտորեն կապված է ժողովրդական տնտեսության վերականգրման, սոցիալիստական ինդուստրացման, գյուղատնտեսության կոոպերացման, սոցիալիստական հասարակարգի կառուցման համար ծավալած պայքարի, հայ ժողովրդի մշակույթի վերածնման և ծաղկման պրոցեսի հետ:

Հայ ժողովրդի սովետական շրջանի պատմության գիտական լուսաբանության ուղղությամբ զգալի աշխատանք է կատարվել: Լույս են տեսել արդյունաբերության ինդուստրացման, գյուղատնտեսության կոլեկտիվացման, քաղաքաշինարարության, ժողովրդի կյանքում կատարված սոցիալական տեղաշարժերին նվիրված բազմաթիվ արժեքավոր մենագրություններ: Ճիշտ լուսաբանություն են ստացել ՍՄԿՊ տեղական հնագույն ջոկատներից մեկի՝ Հայաստանի կոմկուսի ղեկավարությամբ սախապատերազմյան հնգամյակների տարիներին արդյունաբերության և գյուղատնտեսության ասպարեզում հայ ժողովրդի ձեռք բերած նվաճումները, բանվոր դասակարգի և գյուղացիության դաշինքի ամրապնդման ուղղությամբ կատարած աշխատանքը: Բայց մինչև այժմ էլ հրապարակի վրա քիչ աշխատություններ կան սոցիալիզմի կառուցման լենինյան պլանի բաղկացուցիչ մասը կազմող կուլտուրական հեղափոխության, մասնավորապես Հայաստանում կատարված կուլտուրական շինարարության մասին: Այդ բացը լրացնում է վերջերս լույս տեսած պատմական գիտությունների թեկնածու Կ. Ա. Խուդավերդյանի «Կուլտուրական հեղափոխությունը Հայաստանում»¹ մենագրությունը: Հեղինակը, տարիներ շարունակ բարեխղճորեն ուսումնասիրելով արխիվային և հրապարակի վրա եղած նյութերը, բացահայտել է Սովետական Հայաստանում 1920—1940 թվականներին կատարված կուլտուրական շինարարության առանձնահատկությունները, ՍՍՌՄ-ում տեղի ունեցած կուլտուրական հեղափոխության ֆոնի վրա ցույց է տվել հայ ժողովրդի մշակութային վերածնունդն ու ծաղկումը: Հանգամանորեն քննարկելով վերոհիշյալ պրոբլեմին նվիրված գրականությունը, պատշաճը տալով նրանց հեղինակներին (Աշ. Հովհաննիսյան, Ասք. Մուսվյան, Դ. Տեր-Սիմոնյան, Վ. Համբարձումյան, Ա. Հակոբյան, Մ. Աղայան, Գ. Ղարիբջանյան, Ա. Շահինյան, Ս. Խարմանդարյան, Ա. Մնացականյան, Լ. Ղարիբջանյան և ուրիշներ), Կ. Խուդավերդյանը իրավացի կերպով նշել է, որ այդ ամենը, թեև ուղղակի կերպով խնդիր չունենալով Հայաստանում տեղի ունեցած կուլտուրական հեղափոխության պատմությունը լուսաբանելու, բայց հայտնի չափով օգնել և աղբյուրագիտական հիմք են ծառայել սույն աշխատության համար:

¹ К. С. Худавердян, Культурная революция в Советской Армении. 1920—1940, изд. АН Арм ССР, 1966, 302 стр., ответ. редактор С. В. Хармандарян.

Հայաստանում կուլտուրական հեղափոխության հարցերը շոշափող գրականությունը հեղինակը բաժանել է երեք խմբի՝ 1. հայ ժողովրդի պատմությունը արտացոլող ընդհանուր ուսումնասիրություններ, 2. հայ ժողովրդի պատմության առանձին ժամանակահատվածներին նվիրված գործեր և 3. կուլտուրական շինարարությունը պատկերող աշխատություններ:

Հարկավոր է նշել, որ խնդրո առարկա պրոբլեմի վերաբերյալ Կ. Խուդավերդյանը անցյալում նույնպես հրապարակել է մի քանի ծավալուն ուսումնասիրություններ՝ այդ թվում՝ «Կուլտուրական շինարարությունը Հայաստանում առաջին հնգամյակի տարիներին» (Նրևան, 1959), «Հին ժողովրդի նոր կուլտուրան» (Մոսկվա, 1962) և այլն:

Հայաստանում կուլտուրական հեղափոխության ուսումնասիրությունը բազմապլան պրոբլեմ է: Այն ընդգրկում է ժողովրդական լուսավորության, անգրագիտության վերացման, բարձրագույն կրթության զարգացման, բնակչության մեջ կատարվող կուլտուր-լուսավորական, քաղաքական-մասսայական աշխատանքի, գիտության, գրականության, արվեստի զարգացման հարցերը: Ինչ խոսք, որ տրանց ուսումնասիրությունը կարելի է կատարել առանձին-առանձին: Սակայն կուլտուրական հեղափոխության ամբողջական պատմության գիտական լուսաբանման համար հարկավոր է այդ բոլորը միացյալ, կոմպլեքսային ձևով հետազոտել և շարադրել: Մի բան, որ հաջողվել է Կ. Խուդավերդյանին:

Գրախոսվող աշխատությունը կազմված է ներածությունից, երեք գլուխներից (Հոկտեմբերյան հեղափոխությունը և հայկական կուլտուրան, կուլտուրական հեղափոխության սկիզբը Սովետական Հայաստանում, կուլտուրական, հեղափոխության վճռական հաջողությունները Սովետական Հայաստանում) և եզրափակումից: Գրքի վերջում տրված է ամփոփում՝ անգլերեն լեզվով, գրականության և աղբյուրների մատենագիտություն, անվանական ցանկ:

Կ. Խուդավերդյանը, հենվելով սովետական պատմագիտության նվաճումների, մասնավորապես Պ. Կիմի, Գ. Կարապովի, Ի. Սմիրնովի, Մ. Իովչուկի և այլոց գործերի վրա, ղեկավարվելով ՍՄԿՊ ծրագրի դրույթներով, առաջին անգամ մշակել է Սովետական Հայաստանում կուլտուրական հեղափոխության գիտական պարբերացումը և ըստ այնմ էլ շարադրել նյութը: Ինչպես ՍՍՌՄ-ում, այնպես էլ Սովետական Հայաստանում, կուլտուրական մեծ հեղափոխությունը չի ավարտված: Այն բաժանվում է երկու էտապի՝ սոցիալիստական և կոմունիստական: Առաջին էտապը, որի խնդիրն էր՝ ապահովել աշխատավոր զանգվածների կուլտուրական վերելքը, սոցիալիստական կուլտուրայի ստեղծումն ու դեմոկրատացումը իրագործված է: ՍՄԿՊ ծրագրում այդ առթիվ ասված է. «Սոցիալիզմի կառուցումը պահանջում էր բարձրացնել ժողովրդական ամենալայն մասսաների կուլտուրան: Այդ խնդիրը նույնպես հաջողությամբ լուծվեց: Նրկրում իրագործվեց կուլտուրական հեղափոխություն: Այդ հեղափոխությունը աշխատավոր մասսաներին դուրս բերեց հոգևոր ստրկությունից ու խավարից, նրանց հաղորդակից դարձրեց մարդկության կուլտակած կուլտուրայի հարստություններին: Այն երկիրը, որի բնակչության մեծամասնությունը անգրագետ էր, հսկայական թուիչ գործեց դեպի գիտության ու կուլտուրայի զագաթները»²:

² Սովետական Միության կոմունիստական պարտիայի ծրագիրը, Հայաստհրատ, 1961, էջ 14—15:

Երկրորդ էտապը, որի խնդիրն է՝ կոմունիզմի հաղթանակի համար բոլոր անհրաժեշտ կուլտուրական և գաղափարական պայմանների ստեղծումը, շարունակվում է:

Գրախոսվող աշխատությունը ընդգրկում է Սովետական Հայաստանում կուլտուրական հեղափոխության սոցիալիստական էտապի պատմությունը: Հեղինակը, Հայաստանում կուլտուրական հեղափոխության առաջին էտապը նույնպես պարբերաճման է ենթարկում, առաջին շրջանը կոչելով՝ կուլտուրական հեղափոխության սկիզբը, որը ընդգրկում է Հայաստանում սովետական կարգերի հաստատումից (նոյեմբեր, 1920 թ.) մինչև 1930-ական թվականների սկիզբը, երկրորդ շրջանը՝ կուլտուրական հեղափոխության վճռական հաջողությունները, 1930-ականից մինչև 1940-ական թվականները:

Հայաստանում կուլտուրական հեղափոխությունը արդասավորել է ձևով ազգային, բովանդակությամբ սոցիալիստական կուլտուրան, մեծապես նպաստել տնտեսական-քաղաքական խնդիրների լուծմանը, սոցիալիզմի կառուցմանը:

4. Խուզավերողյանը, հավատարիմ պատմականությանը, միանգամայն ճիշտ ելակետ է ունեցել, իր աշխատության առաջին գլխում քննարկելով Հոկտեմբերյան սոցիալիստական մեծ հեղափոխությունից հետո, 1918—1920 թվականներին, հայկական գործերի կոմիսարիատի կուլտուր-լուսավորական աշխատանքը Ռուսաստանի հայաշատ վայրերի բնակչության և մասնավորապես հայ փախստականների (դադթականության) շրջանում: Հայկական գործերի կոմիսարիատի, Լազարյան ճեմարանի, բոլշևիկյան հայերեն թերթերի և գրականության հրատարակման վերաբերյալ սովետական իշխանության լենինյան առաջին դեկրետներն ու որոշումները գաղափարական նախադրյալներ ստեղծեցին 1920 թ. նոյեմբերից հետո Հայաստանում ծավալված կուլտուրական շինարարության համար: Պատշաճ լուսաբանություն է ստացել հայկական գործերի կոմիսարիատի, նրա տպագիր օրգանների, աշխատողների, առանձնապես Վ. Ավանեսովի (Ս. Մարտիրոսյան), Վ. Տերյանի, Աշ. Հովհաննիսյանի, Պ. Մակինցյանի, Ա. Կարինյանի, Բ. Բորյանի, Հ. Հովսեփյանի, Ս. Լուկաշինի (Ս. Սրապիոնյանի) և այլոց գործունեությունը Հոկտեմբերյան հեղափոխության գաղափարները պրոպագանդելու, հայ աշխատավոր զանգվածների շրջանում կուլտուր-լուսավորական աշխատանք կազմակերպելու ուղղությամբ:

«Սովետական Հայաստանում կուլտուրական հեղափոխության սկիզբը» գլխում պատկերված է ժողովրդական կրթության, սովետահայ դպրոցի, մանկավարժական կադրերի պատրաստման, անգրագիտության վերացման, սովետահայ ինտելիգենցիայի ձևավորման, դրականության, արվեստի, մասսաների մեջ կատարած քաղաքական-մասսայական աշխատանքի ողջ պրոցեսը: Ընթերցողի առջև կենդանանում են հեղափոխական հերոսկայով հագեցված այն ժամանակները, որ Սովետական Ռուսաստանի օրինակով, հայ ժողովուրդը պայքարում էր ընդդեմ խավարի, հանուն լուսավոր և երջանիկ կյանքի: Փաստական ուշադրալ նյութերի միջոցով ցույց է տրված լուսավորության առաջին ժողկոմներին՝ Աշ. Հովհաննիսյանին, Պ. Մակինցյանին, Ա. Մուսվաթյանին, Բ. Կարինյանին, Հ. Հովսեփյանին, Ս. Լուկաշինին, Ս. Սրապիոնյանին, և այլոց գործունեությունը, անվանի գիտնականներ Մ. Արեղյանին, Գ. Ղափանցյանին, Հ. Մանանդյանին, Ս. Մալխասյանին, Հ. Գյուլիքեխյանին և այլոց ծառայությունները: Ջերմ էջեր են նվիրված կուլտուր-լուսավորական աշխա-

տանքներին, հրատարակչական գործին, «կորչի՝ անգրագիտությունը» լուգուն-գի կենսագործմանը, բարձրագույն դպրոցի ձևավորմանը, գիտության, գրականության զարգացմանը: 1920 թ. գեկտեմբերին Սովետական Հայաստանի կառավարության որոշմամբ հիմնադրված Երևանի պետական համալսարանը դարձավ կուլտուրայի և գիտության զարգացման խոշոր օջախ, հայ նոր ինտելիգենցիայի ձևավորման դարբնոց: Եթե համալսարանն իր հիմնադրման ժամանակ ուներ 255 ուսանող, ապա տասը տարի անց, 1929—30 ուսումնական տարում, կար ավելի քան 1300 ուսանող: Համալսարանի առաջին ռեկտորը բազմավաստակ պատմաբան Հ. Մանանդյանն էր: Համալսարանում են դասախոսել Մ. Աբեղյանը, Գ. Ղարաջյանը (Ս. Տ. Արկումեզ), Պ. Քալանթարյանը, Գ. Շիրմազանյանը, Գ. Էդիլյանը, Ա. Տերտերյանը, Հով. Հովհաննիսյանը (1922—1930 թթ. ռեկտորներ), Հ. Զեքուտարյանը (Անժուր), Ա. Տեր-Մկրրտչյանը, Ա. Տոնյանը, Հ. Նավակատիկյանը, Լ. Հովհաննիսյանը, Թ. Ավդալբեկյանը, Թ. Թորամանյանը, Ա. Մելիք-Աղամյանը, Հր. Աճառյանը, Հ. Ազատյանը, Աշ. Հովհաննիսյանը, Տ. Մուշեղյանը, Լ. Արիսյանը, Ա. Եղիազարյանը և տասնյակ ուրիշներ: Հեղինակը վառ էջեր է նվիրել սովետահայ ինտելիգենցիայի ձևավորմանը, գիտական արժեքավոր ընդհանրացումներ կատարել: Սովետահայ ինտելիգենցիայի կազմավորումը կոմունիստական կուսակցության լենինյան ազգային քաղաքականության արգասիքն է, հայ ժողովրդի նկատմամբ ցուցաբերված հոգատարության արդյունքը:

Սովետական Հայաստանը մագնիսի նման դեպի իրեն էր ձգում իր զավակներին: Կուլտուրական հեղափոխության առաջին տարիներին հայրենիք վերադարձան հայ ժողովրդի բազմաթիվ նշանավոր մտավորականներ, այդ թվում՝ Մարտիրոս Սարյանը (1921 թ.), Ալեքսանդր Թամանյանը (1923 թ.), Ալեքսանդր Սպենդիարյանը (1924 թ.), Ավետիք Իսահակյանը (1926 թ.) և ուրիշներ, որոնք լծվեցին կուլտուրական շինարարության վսեմ գործին: Գրքում մեծ տեղ է տրված սովետահայ գրականության և արվեստի զարգացմանը. Հ. Թումանյանի, Շիրվանզադեի, Նար-Դոսի, Եղիշ Զարենցի, Ստեփան Զորյանի, Հովհաննես Հովհաննիսյանի, Գեղամ Սարյանի, Նայիրի Զարյանի, Մովսես Արազու, Հակոբ Հակոբյանի, Աբսել Բակունցի, Դերենիկ Դեմիրձյանի, Գևորգ Աբովի, Ազատ Վշտունու, Շուշանիկ Կուրդինյանի և այլոց ստեղծագործությունների վերլուծությանը, սովետահայ գրականությանը մատուցած նրանց ծառայությունների դրվատմանը: Կ. Խուդավերդյանը բանիմացությամբ քննարկում է ժամանակի գրական շարժումները, արվեստի տարբեր ուղղությունները, սոցիալիստական ռեալիզմի հարցերը և հանգում ձիշտ եզրակացությունների:

Գրախոսվող աշխատության փաստալից բաժիններից է «Սովետական Հայաստանում կուլտուրական հեղափոխության վճռական հաջողությունները» գլուխը, որը միաժամանակ պարունակում է տեսական մի շարք ընդհանրացումներ և գիտողություններ: Սովետական Հայաստանի տնտեսական նվաճումները, սոցիալական բարեփոխություններն իրենց բարենրար ազդեցությունն ունեցան կուլտուրական շինարարության վրա: Պատմական կարճ ժամանակամիջոցում լիովին կերպարանափոխվեց Հայաստանը, ագրարային հետամնաց երկրից այն վերածվեց ինդուստրիալ ագրարային երկրի: Կուլտուրական հեղափոխության սոցիալիստական էտապի երկրորդ շրջանը Հայաստանում նշանավորվեց մասսայական անգրագիտության վերացմամբ, դպրոցա-

կան ցանցի ընդարձակմամբ, զիտական մտքի զարգացմամբ, հայ ժողովրդի նյութական-կենցաղային վիճակի արմատական բարելավմամբ: Արդեն 1940—1941 ուսումնական տարում Հայաստանում կար 1155 միջնակարգ դպրոց, 11217 ուսուցիչներով և 326617 աշակերտներով: Նույն ժամանակաշրջանում կար նաև 9 բարձրագույն դպրոց, 62 տեխնիկում, որտեղ սովորում էին ավելի քան 20.000 ուսանող: Հեղինակը ցույց է տալիս, որ եթե 1897 թ. Հայաստանի քաղաքային բնակչության 38,9 տոկոսն էր գրագետ, ապա 1939 թ. այն հասավ 91,9 տոկոսի, իսկ գյուղական բնակչությունը համապատասխանաբար 5,7 տոկոսից հասավ 80,1 տոկոսի: Սա անասելի կուլտուրական թռիչք էր, որ կատարվել էր մեծ հոկտեմբերի դրոշով: Մենագրության մեջ օգտագործված վիճակագրական հարուստ տվյալները, աղյուսակները ավելի են խոսում դարձնում և համոզիչ պատմում մեծ վերափոխությունների, հայ ժողովրդի մշակութային նվաճումների մասին:

Սովետական Հայաստանում կուլտուրական հեղափոխության առաջին էտապի գլխավոր հանրագումարը, ինչպես ճիշտ կերպով ընդգծել է հեղինակը,— դա սոցիալիստական հայ կուլտուրայի ստեղծումն է, որը խարսխված է հայ ժողովրդի դարավոր մշակույթի և ՍՍՌՄ եղբայրական ժողովուրդների, հատկապես ռուս մեծ ժողովրդի կուլտուրական նվաճումների փոխադարձ մերձեցման և հարստացման փորձի վրա: Սոցիալիստական կուլտուրան դա ամբողջ ժողովրդի կուլտուրան է, այն ստեղծում է ժողովուրդը և լիովին ծառայում է ժողովրդին: Սոցիալիստական կուլտուրայի հիմքը մարքսիզմ-լենինիզմն է, ամենահզոր և ճշմարտացի ուսմունքը:

Կ. Խուդավերդյանը իր աշխատության մեջ սոսկ չի նկարագրում փաստերը, այլ այն պատմական քննության է ենթարկում, բայցահայտում կուլտուրական հեղափոխության իրականացման ճանապարհին եղած դժվարությունները, նրա օրինաչափություններն ու առանձնահատկությունները: Կուլտուրական հեղափոխության՝ սոցիալիզմի կառուցման լենինյան պլանի բաղկացուցիչ մասի կարևորագույն օրինաչափությունը, դա նրա իսկական ժողովրդական բնույթն է: Նոր, սոցիալիստական կուլտուրայի ստեղծողը՝ կոմունիզմ կառուցող ժողովուրդն է:

Հեղինակը անդրադառնալով Սովետական Հայաստանում կուլտուրական հեղափոխության առանձնահատկություններին, ուշադրավ փաստեր է բերում մայր հայրենիքի և սփյուռքահայության միջև եղած կապերի, հայ ժողովրդի կոնսոլիդացման գործում երկու հատվածների մշակութային մերձեցման և դրանում կուլտուրական հեղափոխության կատարած դերի վերաբերյալ: Հենց սա էլ Հայաստանում կուլտուրական հեղափոխության առանձնահատկություններից մեկն է, որը բացահայտել է հեղինակը:

Գրախոսվող աշխատության վերջին էջերում անդրադառնալով Սովետական Հայաստանի և ժամանակակից սփյուռքահայ դադթօջախների մշակութային կապերին, ցույց է տրված, որ կուլտուրական հեղափոխության հաջող իրականացման շնորհիվ Սովետական Հայաստանը դարձել է ամբողջ հայ ժողովրդի հոգևոր կյանքի ճանաչված կենտրոնը: Հայ կուլտուրան սովետական իշխանության տարիներին աճել ու զարգացել է ժողովրդի դարավոր կուլտուրական ժառանգության, հոգևոր գանձերի, առաջադիմական, դեմոկրատական տրադիցիաների վրա: Սովետական Հայաստանը կուլտուրայի, առաջավոր գիտության և դրականության երկիր է: Բավական է նշել, որ 1964 թ. Սովետա-

կան Հայաստանում յուրաքանչյուր 10 հազար բնակչին ընկնում էր 2207 դպրոցական սովորող, դա ավելի շատ է, քան այնպիսի լուսավորյալ երկրներում, ինչպիսին՝ Ֆրանսիան 1 (1655), Իտալիան՝ (1089), Անգլիան՝ (1615), էլ չենք խոսում հարևան կապիտալիստական Թուրքիայի (1126) և Իրանի (838) մասին: Նույն թվականին Սովետական Հայաստանի 10 հազար բնակչից 140-ը սովորում էր բարձրագույն դպրոցում, այն ժամանակ, երբ Ֆրանսիայում՝ 55 էր, Իտալիայում՝ 39, Անգլիայում 44, Թուրքիայում՝ 25, իսկ Իրանում՝ 11:

Կուլտուրական մեծ հեղափոխության հաղթարշավը շարունակվում է կոմունիզմի ծավալուն կառուցման ժամանակաշրջանում՝ կոմունիզմի նյութատեխնիկական բազայի ստեղծման, գիտատեխնիկական առաջադիմության, նոր մարդու դաստիարակության համար: Տվյալ ժամանակի առաջադիր խնդիրն է՝ ամբողջ բնակչությունը դաստիարակել գիտական կոմունիզմի ոգով, հասարակության բոլոր անդամների մեջ աշխատանքի նկատմամբ զարգացնել կոմունիստական վերաբերմունք, ապահովել կոմունիզմ կառուցողի բարոյական կողմնակցություն, պրոլետարական ինտերնացիոնալիզմի և սովետական հայրենասիրության իրականացումը, մարդկային անհատի բազմակողմանի և ներդաշնակ զարգացումը, կապիտալիզմի մնացուկների հաղթահարումը մարդկանց գիտակցության մեջ և վարքագծում, բուրժուական գաղափարախոսության մերկացումը:

«Կուլտուրական հեղափոխությունը Սովետական Հայաստանում» մենագրությունը, որ գրված է տևական-գիտական բարձր մակարդակով, իհարկե, զերծ չէ մասնակի թերություններից: Նրանում կան փաստական առանձին տանձադրություններ: Այսպես, օրինակ, 36-րդ էջում նշված է, թե 1918 թ. հունիսի 22-ին լույս է տեսել հայկական գործերի կոմիսարիատի օրգան «Կոմունիստ» շաբաթաթերթի առաջին համարը, որը «...փաստորեն հանդիսացել է սովետական առաջին հայերեն թերթը»: Այնինչ, սովետահայ առաջին թերթը Բաքվի հերոսական կոմունայի օրգան «Տեղեկատուն» է եղել, որի առաջին համարը լույս է տեսել 1918 թ. ապրիլի 3 (16-ին) Բաքվում: 267—268-րդ էջերում հստակ չին շարադրված հայ ժողովրդի կոնսոլիդացման վերաբերյալ մտքերը: Հայ ժողովրդի «կոնսոլիդացման պրոցեսը սկսել է սովետական իշխանության առաջին իսկ օրերից» (էջ 268) արտահայտությունը, մեր կարծիքով, խմբագրման կարիք ունի, քանի որ կոնսոլիդացման պրոցեսը սկսել է ավելի շուտ, Արևելյան Հայաստանը Ռուսաստանին միացվելուց հետո: Գրքում քիչ տեղ է տրված Սովետական Հայաստանում ազգային փոքրամասնությունների մեջ կատարված աշխատանքին, մասսաների ինտերնացիոնալ դաստիարակությանը: Բայց այս և նման կարգի թերություններն ու բանավիճային տեղերն երբեք ստվեր չեն նետում գրախոսվող աշխատության վրա: Կ. Խուդավերդյանի մենագրությունը գրված է աղբյուրագիտական հարուստ բազայի վրա, աչքի է ընկնում իր գիտականությամբ, փաստական նյութի բանիմաց վերլուծությամբ, արժեքավոր ընդհանրացումներով, խիզախ հարցադրումներով և պրոբլեմի սպառնիչ լուծմամբ: Այն որոշակի ներդրում է սովետահայ պատմագրության մեջ:

Վերջում մեզ մնում է նշել, որ Կ. Խուդավերդյանի «Կուլտուրական հեղափոխությունը Սովետական Հայաստանում» մենագրությունը ձևավորված է ճաշակով, հրատարակվել է պոլիգրաֆիական բարձր մակարդակով, որը Հայկական ՍՍՌ ԳԱ հրատարակչության լավ աշխատանքի վկայությունն է:

Խ. ԲԱՐՍԵՂՅԱՆ